



Kæru stjórnir frístundahúsafélaga,

Sveitarstjórn Grímsnes- og Grafningshrepps vonar að þið hafið öll átt gott sumar og vill með þessum tölvupósti annars vegar vekja athygli ykkar á nokkrum atriðum og dusta rykið af öðrum upplýsingum.

Sóttkví

Nú þegar önnur bylgja af covid-19 smitum gengur yfir landið þá vill sveitarstjórn minna á upplýsingar frá Lögreglustjóra Suðurlands og formönnum almannavarnanefnda á Suðurlandi um sóttkví í frístundahúsum.

Umhverfis- og tæknisvið Uppsveita

Umhverfis- og tæknisvið Uppsveita er byggðasamlag sveitarfélaganna Grímsnes- og Grafningshrepps, Bláskógabyggðar, Hrunamannahrepps, Skeiða- og Gnúpverjahrepps, Flóahrepps og Ásahrepps.

Samlagið hefur það hlutverk að annast lögbundin verkefni byggingarfulltrúa og skipulagsfulltrúa auk annarra verkefna sem varða umhverfis- og tæknimál í tilteknum sveitarfélögum.

Á [facebook síðu Umhverfis- og tæknisviðs Uppsveita](#) má finna ýmsa fróðleiksmola sem gott er að vita t.d. um **öryggisnúmer frístundahúsa** en sumir virðast halda að þau skuli staðsetja við afleggjara frístundahúsa eða við hlið til að björgunaraðilar geti séð þau frá vegi.

Tilgangurinn er alls ekki sá - heldur eru öryggisnúmer frístundahúsa öryggistæki fyrir sumarhúsaeygendurna sjálfa eða gesti þeirra, til að gefa björgunaraðilum upp ef slys verður eða önnur vá kemur upp.



Fólk sem er stött í sumarhúsum þarf í neyð að geta fundið þetta númer hratt og vel til að geta gefið það upp neyðarvörðum Neyðarlínunnar - 112.

Með því að fá uppgefið þetta númer fá neyðarverðirnir nákvæm GPS hnit á sumarhúsið og geta þar með vísað viðbragðsaðilum leið á staðinn með mjög nákvæmum hætti.

Grenndarstöðvar

Við höfum nú bætt við einni enn grenndarstöð í sveitarfélaginu og eru þær því orðnar 5 talsins:

Hjá Skátunum á Úlfjótuvatni – Til móts við bæinn Ásgarð – í Hraunborgum – Við Vaðnesveg – Við Torfastaði

Það eru einnig komnir upp gámar á Seyðishólum en verið er að finna stað til framtíðar á því svæði og er sú stöð því enn tengd gámasvæðinu.

Hér má sjá hvar grenndarstöðvarnar eru staðsettar:



Í viðhengi má finna upplýsingar um hvað má fara í gámana á grenndarstöðunum.

Á hverri grenndarstöð er hægt að henda eftirtöldum flokkum:

Plast - pappa - málum - gleri - lífrænum úrgangi - almennu heimilisorpi - skilaskildum umbúðum.

Annað skal fara með á Gámastöðina Seyðishólum.

Nýjasta grenndarstöðin er fyrir neðan bæinn Torfastaði og til að komast að henni er beygt inn á afleggjarann hjá Alviðru og sá vegur keyrður í tæpa 1,5 km og þá er grenndarstöðin á vinstri hönd.



Heimilissorpsgámar í frístundahúshverfum

Nú þegar búið er að opna 5 grenndarstöðvar á nokkrum stöðum í sveitarfélaginu hefur verið ákveðið að fjarlægja heimilissorpsgámana í hverfunum.

Þar af leiðandi verða allir heimilissorpsgámar fjarlægðir úr frístundahverfum í sveitarfélaginu frá miðjum september og munu ekki koma aftur.

Með þessum aðgerðum vonumst við til þess að flokkun í frístundahúsum muni aukast sem gerir okkur kleift að senda stærri hluta úrgangsins til endurvinnslu.

Þannig leggjum við okkar af mörkum til verndar náttúru og umhverfis, svo ekki sé talað um árangurinn þegar litið er til loftlagsmála á alþjóðavísu.

Jafnframt vonumst við til að aukin flokkun skili sér í lægri kostnaði við sorphirðu og sorpeyðingu fyrir alla fasteignaeigendur í sveitarfélaginu.

Heimasíða sveitarfélagsins

Á heimasíðu sveitarfélagsins má bæði nálgast fréttir úr sveitarfélaginu sem og upplýsingar um þjónustuaðila á svæðinu.

Sérstaklega er vakin athygli á nýjum flipa á forsíðunni sem nefnist „Eigendur frístundahúsa“, en þar má finna ýmsar upplýsingar sem viðkoma frístundahúsaeygendum, m.a. þau bréf sem send eru á stjórnir frístundahúsafélaganna.

Aðalfundir frístundahúsafélaga

Við viljum beina því til stjórna að upplýsa sveitarfélagið ef einhverjar breytingar verða á stjórnnum félaganna til að sveitarfélagið sé með réttar upplýsingar og geti komið upplýsingum og öðru á framfæri.

[Hér er eyðublað](#) sem auðvelt er að fylla út eftir hvern aðalfund ef einhverjar breytingar verða.

Lífræna tunnan

Til þess að hjálpa fólki að komast af stað í flokkun á lífrænum úrgangi hefur sveitarfélagið, eins og áður hefur komið fram í öðrum tölvupóstum,

ákveðið að gefa öllum frístundahúsaeygendum sérstök söfnunarílát fyrir úrganginn.

Um er að ræða græna 8 lítra körfu með loki sem hentar einstaklega vel að geyma í eldhúsinu.

Með körfunum mun svo fylgja ein rúlla af maíspokum, en lífræna úrganginn má einungis setja í jarðgeranlega poka úr maís eða pappa.

Pokar eins og þeir sem fylgja með körfunni munu svo koma til með að fást í Versluninni Borg á góðum kjörum.

Hægt er að nálgast körfurnar á skrifstofu sveitarfélagsins á opnunartíma milli 9:00 og 15:00 alla virka daga.

Malbikun á Biskupstungnabraut í dag og kvöld

Frá kl. 04:00 aðfaranótt miðvikudags 26. ágúst til kl. 01:00 aðfaranótt fimmtudags 27. ágúst er stefnt á að malbika Biskupstungnabraut(35) á milli gatnamóta við Hringveg(1) og Þingvallavegar(36).

Biskupstungnabraut verður lokuð og verður hjáleið um Skálholtsveg(31) og Skeiða- og Hrunamannaveg(30). Vegfarendur frá Höfuðborgarsvæðinu sem eiga leið í Grímsnes og Grafning er bent á hjáleið um Þingvelli(36).



Viðeigandi merkingar og hjáleiðir verða settar upp.

Áætlað er að framkvæmdirnar standi frá kl. 04:00 aðfaranótt miðvikudags 26. ágúst til kl. 01:00 aðfaranótt fimmtudags 27. ágúst.

Vegfarendur eru beðnir um að virða merkingar og hraðatakmarkanir og sýna aðgát við vinnusvæðin.

Vinnusvæðin eru þröng og menn og tæki eru við vinnu mjög nálægt akstursbrautum.